

# Parolini: Pront per la regenza

## Preparativas per las elecziuns da la regenza grischuna 2014

DA MARTIN CABALZAR

■ **La Partida burgais-democratica vul cumbatter per ses segund mandat en la regenza grischuna da la primavera 2014. Per mauns da la radunanza da nominaziun ha la Partida burgais-democratica d'Engiadina Bassa/Val Müstair nominà il deputà e capo-communal da Scuol Jon Domenic Parolini.**

Quai ha *Jon Domenic Parolini* confermà ier vers il «Bündner Tagblatt». Ed el ha accentuà ch'el na candideschia betg mo per far in servetsch a sia partida, mabain perquai ch'el haja in interess personal per «l'incumbens fascinant» d'in cusseglier guvernativ. Per la nominaziun dal vicepresident dal cussegl grond na stettia el uschia dentant betg a disposiziun. Anc averta è dentant la dumonda sche Parolini candidescha en cas ch'el vegn nominà per la regenza era parallelmain per las elecziuns dal cussegl grond che han lieu il medem di. Questa opziun è legalmain pussaivla. Damai ch'el fetschia gugent politica n'exclauda Parolini betg questa opziun, tant pli che sia partida regiunala sustegnia questa opziun.

### Politicher fitg engaschè

Jon Domenic Parolini (54) è maridà e bab da dus uffants. Da professiun è el inschigner forestal e dr. da las scienzas tecnicas ETH. Sper ses mandats da president communal e deputà è Parolini president da la pbd grischuna, parsura da la gruppa rumantscha dal cussegl grond e parsura da l'Agentura da novitads rumantscha. El fa part dals cussegls administrativs dal Bogn Engiadina, da las Pencilaras Motta Naluns, da la Grischelectra etc.

### Concurrenza da la pps

Actualmain è la pbd la suletta partida cun ina represchentanza dubla en la regenza. Da quintar èsi che cunzunt la Partida populara svizra (pps) haja tut interess da conquistar ina mandat, probabel danovamain cun cusseglier nazional *Heinz Brand*. Schebain er ils verd-liberals vegnan cun in candidat e la pcd u la ps cun in segund stat anc scrit en las stailas, è dentant pauc probabel. Tar plirs posts vacants fissan las schanzas pli grondas che questa giada.



Jon Domenic Parolini fiss «fitg motivà» per in post en la regenza.